

## **Акафист святителю Варсонофию, епископу Тверскому, Казанскому чудотворцу**

### **Кондак 1**

Возбранному святителю и чудотворцу Варсонофию составим похвалу, яко усердному молитвеннику нашему и скорому помощнику. Ты же, святителю, яко имеяй дерзновение ко Господу, умоли Его избавляти нас от всяких бед и скорбей, да с радостью зовем ти: Радуйся, Варсонофие, Казанский чудотворче!

### **Икос 1**

Ангелов Творец и всея твари Содетель яви тя Церкви Своей святей новаго святителя и чудотворца, имущаго к Нему дерзновение молить об избавлении нас от всяких бед и скорбей. Сего ради восхваляем тя сице: Радуйся, благословенное чадо благочестиваго отца, сподобившагося благодати священства; Радуйся, благодатный воспитанниче благоговейнаго учителя. Радуйся, орошенный благодатию, лиявшеюся от его наставлений; Радуйся, отроче, приявший в сердце твое начало премудрости. Радуйся, яко тою вся буяя юности от сердца твоего отгнал еси; Радуйся, скоро и спешно навывнувший наказанию закона Божия. Радуйся, разумом и добродетельным житием Пресвятое Имя Божие прославивый; Радуйся, радости и утешение твоим родителем. Радуйся, крине, возвращенный на земли для райских селений; Радуйся, молитвенниче наш усердный. Радуйся, крепкий наш заступниче; Радуйся, мудрый и кроткий наш наставниче. Радуйся, Варсонофие, Казанский чудотворче!

### **Кондак 2**

Видя суету мира и привременных благ его, ты, святителю Варсонофие, единаго Бога крепко от юности твоя возлюбил еси и слезами молитвенными радость небесную на земли сеял еси. Темже мы, радуяся, вопием с тобою Богу: Аллилуиа.

### **Икос 2**

Разумно уразумевав попущение премудраго Промысла, хотящаго предуготовати из тебе новаго проповедника веры Христовы для неверующих агарян, ты, святителю Христов, благодушно в юности твоей крест плена понесл еси и в стране пленения ведению языка агарянского научил еси. Сего ради приими от нас похвалы сия: Радуйся, предуготованный сосуде мира Христова, излияннаго на неверовавших; Радуйся, пастырю, воспитанный посреде волков. Радуйся, светильниче Церкви, предуготованный под спудом; Радуйся, столпе Церкви Православныя, укрепленный крестом. Радуйся,

смирением, кротостию и послушанием пленивших тя удививый; Радуйся, теми любовь их к тебе приобретый. Радуйся, слезный сеятелю радости небесныя; Радуйся, всего себе воле Божией предавый. Радуйся, райский крине, посреде терний на земли произрастший; Радуйся, бисере многоценный, златом от плена искупленный. Радуйся, отца и мать ради Христа оставивый; Радуйся, девства и чистоты хранителю. Радуйся, Варсонофие, Казанский чудотворче!

### **Кондак 3**

Силу Христа Спасителя, влекущую к Нему, уразумев, святителю, ты душою и телом сему влечению последовал еси, и яко Ангел, на крилах поста и молитвы к Нему воспарил еси, непрестанно воспевая Богу: Аллилуиа.

### **Икос 3**

Имея во уме и сердце твоём единого Бога, ты, святителю, вся красная мира сего презрел еси и уединение с нестяжанием крепко возлюбил еси, служа Богу постом и молитвою. Темже вопиём ти: Радуйся, Господа Бога верный служителю; Радуйся, весь ум твой богомыслием освятивый. Радуйся, усердный и верный воли Христовой исполнителю; Радуйся, премудрый монахов наставниче. Радуйся, добрый о них попечителю; Радуйся, девства и чистоты хранителю. Радуйся, любимиче братии твоя; Радуйся, образе и подвижниче добродетелей. Радуйся, зеркало евангельскаго совершенства; Радуйся, живой свитче закона Божия. Радуйся, верный подражателю Христов; Радуйся, Варсонофие, Казанский чудотворче!

### **Кондак 4**

Буря внутренних скорбных помышлений обыде тя, святителю, егда внезапно в чуждую землю пленен был еси, идеже и горькия слезы проливал еси. Егдаже всецело воле Божией предался еси, тогда непрестанно дивному в судьбах Своих Богу вопиял еси: Аллилуиа.

### **Икос 4**

Слышав о святом житии твоём, Царь Иоанн радовался, яко Российския имяше таковыя потаенныя угодники Божия, и не таяя светильника под спудом, устрой тебе быти игумена Песношския обители. Мы же, радуясь, вопиём ти: Радуйся, светильниче, из под спуда на свещник поставленный; Радуйся, молитвенниче неусыпный. Радуйся, врачу ран сердечных прозорливый; Радуйся, целителю греховных недугов. Радуйся, великодушный строптивости препобедителю; Радуйся, сострадательный и терпеливый братии твоя

любителю. Радуйся, невидимых врагов мудрый прогонителю; Радуйся, благоговейный Божий служителю. Радуйся, благочиния монастырского мудрый устроителю; Радуйся, обрадованный посещением твоей обители от Царя державнаго. Радуйся, обрадовавший его твоим благоговением и смирением; Радуйся, ангеле во образе чловечестем. Радуйся, Варсонофие, Казанский чудотворче!

### **Кондак 5**

Боготечней звезде подобен был еси, святителю, в восхождении твоём на твердь церковную, и последуй, яко солнцу, святителю Гурию, по воле Царя державнаго шествовал еси в богоспасаемый град Казань, поя Богу: Аллилуиа.

### **Икос 5**

Видеша тя, святителю, православнии жители града Казани устрояющаго в ней первую обитель во имя благолепнаго Спасова Преображения, и в благоговейной радости о Господе, творящем дивная дела Своя, вопияху тебе сице: Радуйся, нечестия ревностный искоренителю; Радуйся, благочестия усердный ревнителю. Радуйся, магомедовы тмы дивный прогонителю; Радуйся, света Христова ревностный распространителю. Радуйся, первыя обители в Казани устроителю; Радуйся, дивный избранниче Божий. Радуйся, благодать и милость Господню в братии твоей водворивый; Радуйся, число иноков умноживый. Радуйся, благочиния церковнаго блюстителю; Радуйся, пения Божественнаго искусный учителю. Радуйся, безчиния и нечестия мудрый обличителю; Радуйся, Варсонофие, Казанский чудотворче!

### **Кондак 6**

Проповедник богоносный явился еси, святителю, во граде Казани, обличая нечестивых поклонников лжепророка самем их языком, и не могущих ничтоже рещи противу тебе обращая к единому в Троице славимому Богу, поя Ему: Аллилуиа.

### **Икос 6**

Возсия в Казани просвещение истины и отгна от нея тму нечестия Христос, истинный Бог наш, Емуже в сем усердно послужил еси, святителю. Темже взываем ти сице: Радуйся, насадителю нивы Христовы в стране нечестия; Радуйся, напоителю оной живыми водами Христова учения. Радуйся, ничтоже себе восписуяй, но вся к единому Богу относяй; Радуйся, вождю воинства Христова, посекающаго вся противныя силы нечестия. Радуйся, ангеле, посланный от Бога ко истреблению плевел на ниве Его; Радуйся,

друзе Божий, желающий всем спасения. Радуйся, благодатный врачу душ и телес; Радуйся, кроткий указателю лживости магометанския веры держащимся ея. Радуйся, мудрый удостоверителю в Божественности веры христианския; Радуйся, неверных учителю веры в Пресвятую Троицу. Радуйся, светило, сияющее на тверди Казанския области; Радуйся, теплото, согревающая всех, притекающих к тебе, любовь. Радуйся, Варсонофие, Казанский чудотворче!

### **Кондак 7**

Хотяй устроить спасение Казанских татар, научи тя, святителю, врачебной хитрости, да будеши им врач душ и телес; ты же, имея любовь богоподобную, принимал еси вся недужныя, притекающия к тебе, указуя коемуждо на благопотребное врачество, паче же на Всецелителя Господа Иисуса Христа, поя Ему: Аллилуиа.

### **Икос 7**

Новое и дивное средство к обращению неверных показа Господь в твоём, святителю, врачевании телесных болезней, привлекая к тебе множество недужных всякаго рода, ихже купно с присными их ко Христу приводил еси. Темже, безмездный врачу, приими от нас таковая: Радуйся, безмездным врачом мудрый подражателю; Радуйся, яко познал еси благодатную силу их безмезднаго врачевания. Радуйся, врачевавый недужныя привлечения ради к вере неверующих; Радуйся, употреблявый врачевание телесное к славе Имене Божия и ко спасению ближних. Радуйся, ревностный сотрудниче святителя Гурия; Радуйся, искренний и верный его друже. Радуйся, успокоителю его на одре смертном; Радуйся, и по смерти с ним не разлучивыйся. Радуйся, молитвенниче наш усердный; Радуйся, хранителю обители твоея неусыпный. Радуйся, граду Казани похвало и утверждение; Радуйся, светило, сияющее на тверди Православныя Церкви. Радуйся, Варсонофие, Казанский чудотворче!

### **Кондак 8**

Странное бе предсказание о тебе, святителю, прозорливаго святителя Акакия, иже еще во время твоего иеродиаконства предрече, яко будеши в богоспасаемом граду Тфери управляти людьми Божиими. Мы же, благоговевя пред Богом, дивно устроившем твое Ему служение, поем Ему: Аллилуиа.

### **Икос 8**

Весь был еси Божий, святителю, егда поставлен был еси во епископа богоспасаемому граду Тфери, служа Богу телом и душою: тело изнуряя постом и непрестанным трудом, душу же питая

молитвою и словом Божиим. Темже прими от нас сицевая: Радуйся, светильниче Тферския Церкви; Радуйся, добрый ея пастырю. Радуйся, словесных овец мудрый питателю; Радуйся, верный Христов подражателю. Радуйся, Апостолов наследнице; Радуйся, неутомимый делателю нивы Божия. Радуйся, благовременный ея напоителю; Радуйся, отеческих преданий хранителю. Радуйся, веры Христовы православный учителю; Радуйся, строгий поста блюстителю. Радуйся, образ верующим в тебе самом написавый; Радуйся, неусыпный молитвенниче о стаде твоём. Радуйся, Варсонофие, Казанский чудотворче!

### **Кондак 9**

Вси Ангели небеснии восхвалиша Бога, даровавшего тебе, святителю, чудный дар врачевания телесных и душевных болезней, имже всех привлекал еси, поя Богу: Аллилуиа.

### **Икос 9**

Витии многовещаннии риторскими своими языки не возмогут изрещи пастырских твоих подвигов, святителю: како бо мощно вся поведати о строгости поста твоего или о неусыпном препровождении ночей в молитве; мы же благоговейно взываем ти сице: Радуйся, пастырю, в строгом посте себе содержащий; Радуйся, подвижниче благочестия, ночи в молитве без сна препроводивый. Радуйся, собеседниче Божий; Радуйся, сеятелю небесных радости твоими молитвенными слезами. Радуйся, плоть твою всецело духови поработивый; Радуйся, со страстьми и похотьми ю распявый. Радуйся, Тферскую паству твою от заразы молитвами сохранивый; Радуйся, сердобольный о верных попечителю. Радуйся, во всех скорбях их утешителю; Радуйся, пастырю милосердный ко всем бедствующим. Радуйся, участниче во всех скорбях и нуждах ближних твоих; Радуйся, сострадателью всем страждущим. Радуйся, Варсонофие, Казанский чудотворче!

### **Кондак 10**

Спасти хотя душу твою, святителю, ты, возжелев покоя духовнаго, Тферскую паству твою старости оставил еси и переселился еси паки в устроенную тобою Казанскую обитель боголепнаго Спасова Преображения, поя в ней до конца земнаго жития твоего Богу: Аллилуиа.

### **Икос 10**

Стена и крепкое ограждение был еси, святителю, Казанския твоя обители, отвращая от нея все беды и напасти святыми твоими

молитвами, и примером своим утверждая в братии благочестие и святость. Темже по долгу вопием ти: Радуйся, столпе благочестия; Радуйся, трудолюбивый молитвенниче. Радуйся, поста и молитвы учителю; Радуйся, милостыни щедрый раздаятелю. Радуйся, благочиния церковного ревнителю; Радуйся, наставниче монахов предобрый. Радуйся, неопустительный посетителю ежедневных службы Божия; Радуйся, земный ангеле и небесный человеце. Радуйся, от земли на небо возлетевый; Радуйся, и по смерти твоей нас не оставляяй. Радуйся, присный наш благодетелю; Радуйся, всегдашний наш во Христе наставниче и попечителю. Радуйся, Варсонофие, Казанский чудотворче!

### **Кондак 11**

Пение всеумиленное приносим ти, святителю, и молим тя умолити Христа Бога, да дарует всем нам благодать и силу ко спасению, да выну с тобою поем Ему: Аллилуиа.

### **Икос 11**

Светоприемный светильник истинного света сущим на земли являеши, святителю Варсонофие, просвещаеши бо сердца верных и разуму Божественному вся наставлявши, поучая и нас радостно взывати тебе: Радуйся, святителю, предстояй Престолу Божию; Радуйся, Пресвятая Троицы присноблаженный служителю. Радуйся, предстояй и последуй Агнцу Божию; Радуйся, Матере Божия собеседниче. Радуйся, Херувимов и Серафимов сообщниче; Радуйся, Архангелов и Ангелов сослужителю. Радуйся, Предтечи Господня спредстоятелю; Радуйся, Апостолов подражателю. Радуйся, Мучеников сорекователю; Радуйся, Святителей равностоятелю. Радуйся, Преподобных украшение; Радуйся, всех святых сожителю. Радуйся, Варсонофие, Казанский чудотворче!

### **Кондак 12**

Благодать, данную ти от Бога, ведуше, притекаем к раце мощей твоих, святителю Варсонофие, усердно умоляюще тя о неоставлении нас святыми твоими молитвами, да и мы по окончании нашего земного жительства с тобою воспоем Богу: Аллилуиа.

### **Икос 12**

Поюще блаженную кончину твою, еюже, яко орел, в горнях воспарил еси, молим тя, святителю Варсонофие, быти нам во всем ко благу помощником и всегда слышати ны, усердно взывающих ти: Радуйся, Святителей похвало; Радуйся, скорый помощниче с верою к тебе притекающим. Радуйся, неусыпный хранителю иноков твоея

обители; Радуйся, защитниче граду Казани. Радуйся, усердный молитвенниче о всех, к тебе притекающих; Радуйся, врачу недугующих. Радуйся, пастырю, соблюдаяй словесное стадо твое; Радуйся, помощниче и защитниче обидимых. Радуйся, дарователю радости плачущим; Радуйся, обуреваемых наставниче. Радуйся, скорбных утешение; Радуйся, спасаемых ободрителю и подкрепителю. Радуйся, Варсонофие, Казанский чудотворче!

### **Кондак 13**

О всеблаженный и святой святителю отче Варсонофие, святыми твоими молитвами умоли Господа Бога, еже избавити всех нас, притекающих к тебе, от всякия скорби, от всяких бед и напастей, и от всякаго зла, душевнаго и телеснаго, да выну с тобою поем Ему: Аллилуиа.

**(Этот кондак читается трижды, затем икос 1 и кондак 1)**